

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
KANTONALNI SUD U SARAJEVU
Broj: 009-0-Su-24-000876
Sarajevo, 26.12.2024.godine

Na osnovu člana 31. Zakona o sudovima u Federaciji Bosne i Hercegovine („Službene novine Federacije BiH“ broj 38/05, 22/06, 63/10, 72/10, 7/13, 52/14 i 85/21), člana 8. Pravilnika o unutrašnjem sudskom poslovanju („Službeni glasnik BiH“ br. 66/12, 40/14, 54/17, 60/17 - Ispravka, 30/18 i 83/22), a u vezi sa Zakonom o budžetima u Federaciji Bosne i Hercegovine ("Službene novine Federacije BiH", br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25a/22) i Standardima interne kontrole u javnom sektoru u Federaciji Bosne i Hercegovine („Službene novine Federacije BiH“, broj 75/16), predsjednik Kantonalnog suda u Sarajevu donosi

PRAVILNIK O REPREZENTACIJI I POKLONIMA
U KANTONALNOM SUDU U SARAJEVU

Član 1.

Ovim pravilnikom regulišu se pitanja reprezentacije i poklona u Kantonalnom sudu u Sarajevu (u daljem tekstu: Sud), kao što su: visina reprezentacije, korištenje sredstava reprezentacije, procedura i pravila primanja i davanja poklona.

Član 2.

Reprezentacija predstavlja izdatak koji se javlja u toku redovnog poslovanja Suda u cilju stvaranja i održavanja poslovnih odnosa, obilježavanja godišnjica i drugih značajnih događaja, kao i ostvarivanje interesa Suda, a koji se koriste u odnosu sa službenim strankama, te izdaci učinjeni prilikom kupovine poklona koji se daju u prigodnim prilikama, kao i ostali izdaci koji nisu navedeni, a koji su učinjeni u drugim slučajevima kada se predstavlja djelokrug rada Suda.

Član 3.

Sredstva za reprezentaciju su sredstva planirana Budžetom Suda, za tekuću godinu, a odnose se na troškove koji nastanu tokom radnih sastanaka, konzumacijom pića i osvježenja, jela, odnosno troškovi roba koje se kupuju za potrebe internog bifea kabineta, troškovi koji nastanu korištenjem ugostiteljskih usluga povodom organizovanja poslovnih susreta, obilježavanja praznika i manifestacija (eksterna reprezentacija) te troškovi kupovine poklona.

Član 4.

(1) Visinu sredstava za reprezentaciju za potrebe Suda određuje predsjednik Suda u skladu sa raspoloživim finansijskim sredstvima i na osnovu pregleda

utrošenih sredstava reprezentacije u prethodnoj godini te planiranih i procijenjenih sredstava u Budžetu za tekuću godinu u kojoj se koriste.

(2) Stručni savjetnik za javne nabavke prilikom pripreme Prijedloga plana javnih nabavki za tekuću godinu, obavezan je u isti uvrstiti i nabavku reprezentacije, a sve u okviru odobrenih budžetskih sredstava.

(3) Nabavka robe, u okviru reprezentacije, vršit će se po proceduri primjenom jednog od postupaka propisanih Zakonom o javnim nabavkama.

(4) U ovisnosti od mjesta nastanka troška, reprezentacija može biti interna i eksterna.

(5) Pravo na troškove reprezentacije ima predsjednik Suda, ali i drugi zaposleni u Sudu isključivo kada ih za to posebnom odlukom ovlasti predsjednik Suda i to u iznosu koji je utvrđen u skladu sa stavom (1) ovog člana.

(6) U slučaju da ovlašteni zaposlenici od strane predsjednika Suda za korištenje reprezentacije prekorače dozvoljeni limit, dužni su dostaviti pismeni izvještaj o prekoračenju na osnovu kojeg će predsjednik Suda procijeniti opravdanost prekoračenja, te eventualno zatražiti nadoknadu prekoračenog iznosa od zaposlenog.

Član 5.

Predsjednik Suda dužan je sredstva predviđena za reprezentaciju koristiti razumno i primjereno, vodeći računa o uslovima i potrebama, kao i raspoloživim sredstvima za reprezentaciju.

Član 6.

Pravdanje korištenja sredstava reprezentacije vrši se podnošenjem pismenog izvještaja uz koji se prilaže odgovarajući račun sa specifikacijom konzumacije.

Član 7.

(1) Pismeni izvještaj obavezno sadrži datum, mjesto i svrhu korištenja sredstava reprezentacije.

(2) Račun mora biti original i potpisan od strane lica koje je koristilo usluge reprezentacije te potpisom odobren od strane predsjednika Suda.

(3) Izvještaj iz člana 6. ovog pravilnika sa ovjerenim i odobrenim računom od strane predsjednika Suda dostavlja se Odsjeku za računovodstvo Suda.

Član 8.

(1) Pokloni su materijalni predmeti koji se uobičajeno daruju zaposlenicima Suda prilikom odlaska u penziju i drugim licima ili institucijama prilikom protokolarnih posjeta, posebnih događaja, datuma ili praznika.

(2) O nabavci i darivanju takvog poklona posebnom odlukom odlučuje predsjednik Suda.

(3) Odlukom iz stava (2) ovog člana predsjednik Suda određuje i visinu finansijskih sredstava koja odobrava za kupovinu poklona, te ovlašćuje lice koje će izvršiti nabavku poklona.

(4) Nabavka poklona vrši se na način propisan Zakonom o javnim nabavkama.

Član 9.

- (1) Kod primanja poklona mora biti jasno utvrđeno da li su oni namijenjeni Sudu ili predsjedniku Suda.
- (2) Predsjednik Suda ne smije zadržati poklon čija tržišna vrijednost prelazi 200,00 KM (slovima:dvijestotine KM) te je isti dužan prijaviti, evidentirati i predati Sudu.
- (3) Zaposlenicima u Sudu nije dozvoljeno primanje poklona koji su u vezi sa obavljanjem redovnih poslova i zadataka.
- (5) Zaposlenicima u Sudu nije dozvoljeno primanje poklona od trećih osoba osim u korist Suda i predsjednika Suda, s tim da isti mora znati za primanje poklona.
- (6) Zabranjeno je zahtijevanje ili primanje od fizičkih ili pravnih osoba bilo kakve dobiti, naknada u novcu, uslugama ili drugih oblika koristi u namjeri da zaposlenik u okviru svojih ovlaštenja učini što ne bi smio učiniti ili ne učini što bi bio dužan učiniti.

Član 10.

Sud će prihvatiti namjenske poklone ukoliko se mogu koristiti prilikom obavljanja ili su u vezi sa obavljanjem poslova i zadataka Suda te ukoliko prijem istih nije protivan relevantnim propisima i etici ili od strane davaoca nije uslovljen činjenjem ili propuštanjem određenih radnji protivno zakonu i etičkom ponašanju.

Član 11.

Na sva druga pitanja u vezi troškova reprezentacije i poklona koja nisu regulisana ovim pravilnikom neposredno se primjenjuju opšti propisi koji se odnose na ovu oblast te odredbe etičkog kodeksa.

Član 12.

- (1) Ovaj Pravilnik stupa na snagu danom donošenja.
- (2) Stupanjem na snagu ovog Pravilnika prestaje da važi Pravilnik o poklonima i reprezentaciji u Kantonalnom sudu Sarajevo broj Su:1532/05 od 31.10.2005.godine.

PREDSJEDNIK SUDA
Vladimir Špoljarić

